

Raymond Schwartz,  
Pli bone .... (Naiva kanzoneto)

Pli bone estas teni  
Birdeton en la man'  
Ol dudek birdojn ... vidi  
Sur supro de platan'!

Pli bone estas pagi  
Kotizon al la grup'  
Ol frankojn mil malŝpari  
Kun diboĉema pup'!

Pli bone estas stari  
En plena veturil'  
Ol sisi en malplena  
Stomak' de krokodil'!

Pli bone estas sisi  
Sur pajlo de karcer'  
Ol kuŝi en la ĉerko  
Du metrojn sub la ter'!

Pli bone estas kanti  
Eĉ laŭ malĝusta ton'  
Ol senrespekte ... tusi  
En mezo de salon'!

...

Pli bone estas pinĉi  
Knabinon en la krur'  
Ol tikli episkopon  
Ĉirkaŭe de tonsur'!

Pli bone estas senti  
Kiseton sur vizaĝ'  
Ol senti aŭ ricevi  
Piedon sur postaj'!

Pli bone estas skribi  
Insultojn per krajon'  
Ol sendi komplimentojn  
Per kuglo de kanon'!

Pli bone estas manĝi  
Bifstekon kun buter'  
Ol nutri sin per amo,  
Promesoj kaj esper'!

Pli bone estas plugi  
La kampojn en oaz'  
Ol sarki tro obstine  
En truoj de la naz'!

Pli bone estas kapti  
Dek muŝojn de l' plafon'  
Ol kapti nazkataron  
Dumnokte sur balkon'!

...

Pli bone estas diri  
Stultaĵojn, kiel mi,  
Ol ronki sur fotelo  
De la akademi'!

Pli bone estas fini  
Ĉi kanton antaŭ fin'  
Ol aŭdi la publikon  
Kriegi: „Fermu ĝin!“

*Verkinto de tiu ĉi Esperanta poemo estas RAYMOND SCHWARTZ (\*1894-04-08 – †1973-05-13).*

*Arg-802-1608 (2013-01-31 16:08:12)*

*Pri la aŭtoro vidu ankaŭ <http://kabareto.esperanto.cc/> kaj [http://eo.wikipedia.org/wiki/Raymond\\_Schwartz..](http://eo.wikipedia.org/wiki/Raymond_Schwartz..)*